

Per la continua calada di forestee
gh'era in l'aria cittadina on quajcoss de brutt:
coi noeuv teorii de laorà pocch e fà danee
Milan la cominciava a imbastardass del tutt.

Sul tecc d'on tramm derajaa, el Corridon,
capell de felter, cravatta svolazzant,
cont el fà, i gest e i parol d'on caporion
l'arringava ona folla de scioperant.

Lù el parlava de scioperi a oltranza,
de pollaser tucc i dì, nò domà a Natal;
e giò di gran battiman d'esultanza;
« fadigà pocch e mangià e bev: quest l'é l'ideall! ».

Quell publich che'l pareva portaa a di ecèss
el s'era man man quietaa, 'me per incant;
el gustava col nas in l'ari i bej promèss
che'l tribun el dispensava giò de l'alt.

E l'orator, in fond, el m'era simpatic;
l'era nò vun de quej d'incoeu, antiitalian;
ben che'l fuss on sindacalista fanatic
se sentiva in Lù el generos sangh marchigian:

nient de fà con quij s'ciav de l'Infoibador
che al confin hann coppaa di compagn Italian,
perché minga passaa al nemis come lor,
comunista infàmm, brutta razza de can!

Gh'é vegnuu poeu la Gran Mobilitazion
e Lù l'era diventaa interventista:
la soa l'era ona presa de posizion
contra 'na Germania squas tutt' socialista.

Alora l'é stada on'altra bugada:
i compagn hann lassaa perd Lù e el sò ideal,
e hann faa ona comoda e vigliacca voltada:
« salvà la propia ghirba: quest l'é l'esenzial! ».

Fin che'l parlava de pollaster, fiasch de vin
e scioperi, tucc eren li pront a lodall;
quand el gh'ha ditt d'afrontà in guerra el destin,
i eroich compagn de lotta gh'hann mostraa i spall.

Al riciàmm del doer Lù l'ha rispost a l'apell
coi pocch restaa fedel a i sò punt de vista;
se l'é andaa volontari e el gh'ha lassaa la pell,
l'é perché, in fond, l'era on pur idealista.

On'Italia, minga ingrata, l'ha proveduu
a onorà l'Eroe che'l s'era sacrificaa:
Corridonia el se ciama el paès doc l'é nassuu;
e quest l'é on nom che l'é nò de cert usurpaa.